

indicat. Huiusmodi autem hepar quantum faciat ad replendum caput, nemini est dubium, cum semper excitet vapores, qui translati ad cerebrum, augent illam materiam in cerebro. Quia in habitibus symbolum, &c. Ventriculus quoque frigidus cruditates multas multiplicauit, quae etiam ad capitis repletionem contulerunt. Haec igitur sunt causae, quae in corpore sunt, & effecerunt materiam illam immediatam epilepsiae. Quibus accesserunt res non naturales, etiam adiuuantes illas internas. Victus fuit inordinatissimus, comedit quaecunque oblata fuerunt: copiose quoque legumina, & brassicas ingessit. Accessit etiam ad haec, quod est venditor caleorum, inde in apotheca delitescit, non exercitatus, & inde plurimum multiplicat materias frigidas & crassas. Aestatis autem tempore exercitatur inordinatissime, a cibo sumpto multum discurret: quod, quantum malum sit, facile patet, quia cibus crudus, nondum coctus rapitur ad venas, distribuitur per corpus, inde multa excrementa in corpore generantur. Item frequentius in sole versatur, qui exiccat cerebrum, & attrahit materias. Inter extrema duo versatur, vno tempore nihil prorsus se exercet, alio autem multum, & intempestiue, quod vtrunque cruditates multiplicat. Cum igitur habuerit temperaturam huiusmodi multiplicante excrementa frigida, crassa, & victus rationem inordinatissimam: non est mirum si incidit in has affectiones, quas omnes patitur, cum illae materiae crassae obstruant ventriculos cerebri, & iuxta quantitatem oppletionis eueniat affectio. Cum etenim valde obstruit, accidit epilepsia, vt praeterito anno, & abhinc duodecimo die ei contigit. Cum vero minus, accidit incubus in somno, vt nocte hodierna. Non differt enim incubus ab epilepsia nisi quantitate, & est incubus quasi leuis epilepsia. Sed hic quaereret aliquis: Cum sit materia in capite, cur non efficit epilepsiam, nisi bis? Fieri potest vt virtus expulsiva fortis, tanquam in iuene, expellat materias, & inde affectiones non sint ortae: vel fuit pauca materia, quae expulsa non causabat epilepsiam. Sed cum materiae auctae sunt tam per essentiam quam per consensum, & ab inferioribus partibus & membris accessit qualitas mala ex crure, inde facta est epilepsia. Item si quaereres, an eius cerebri temperatura sit talis a natiuitate? de hoc nihil est quod dicam certi. Potest esse a natiuitate, potest etiam esse acquisita mala viuendi ratione. Vt igitur vera veris consentiant, patitur epilepsiam ex materia partim generata in cerebro, ob debilitatem cerebri, non conscientis alimentum proprium: partim per consensum, a membris subiectis demandantibus, vt ventriculo & hepate. Hic etiam dicam pauca de illa aura, quae ascendit ex pede. Potest ibi materia putrescere, sed Deus scit, si est ibi. Si est, potest putrescere, ex quo pessimi vapores eleuantur, qui sua mala qualitate afficiunt cerebrum, qui etiam illi materiae additi facile causant epilepsiam, quia in habentibus symbolum, &c. Ad curam iam deueniamus. Est hic intemperies cum materia, materiae debetur euacuatio, intemperiei alteratio. Sed mala qualitas non potest alterari, nisi euacuetur materia. Igitur euacuanda, quia repletioni euacuatio debetur.

**A** Sed cum sit nunc tempus hybernū, & simus circa solstitium hyemale, ante quae solstitia medici non iubent purgare, nisi quindecim diebus. Quaeritur igitur, an debeat euacuari. Quod euacuari debeat, morbi magnitudo poscit, quia epilepsia omnes sensus hebetat atque destruit, & epileptici in omnibus actionibus suis fiunt torpidi. Item si epilepsia firmata fuerit, & perseverauerit, conuertitur aliquando in apoplexiam, & tales apoplexia ferè moriuntur. Quod non debeat euacuari, plures concurrunt causae. Prima est, quia humores in centro sunt congelati, non poterunt rectè educi, & extrahi. Si enim extraheremus sanguinem, rarefieret corpus, laederetur facile a frigore: quia is non est vnus e principibus, qui calido conclaui, aut calidis vestibus defendi possit a frigore, & ita essent vltima peiora primis. Si autem vertimus nos ad morbi magnitudinem, est necessarium vt euacuemus, licet temporis constitutio contrarium nobis suadeat. Ego inter vtrunque versans, cum morbus det inducias, euacuarem eum attenuante victu, & praescriberem victum tenuissimum. Ita enim mea sententia fert, non vt determinè, sed vt meam sententiam retegam, & conscientiae satisfaciam. Et purgarem cum leuissimè purgantibus, quae ventriculum parum, & cerebrum euacuarent: vt sunt pillulae mastichinae, pillulae de rhabarbaro, de agarico, de tribus, de aloe. Haec & ventriculum, & cerebrum purgarent leuissimè: illae de tribus spiritum cordis reficerent, ob crocum. Terebinthina etiam esset optima: sed quia nonnulli medici, & quidem doctissimi sunt in ea sententia, quod odore suo augeat epilepsiam, & adducunt suas rationes, ego de hac re modò non disputo. Parum quidem est, potest omitti terebinthina. Et illis, prius a me dictis, poterit vti bis, vel ter in septimana. Et cum continuabit in his purgationibus, leuibus per mensem vnū vel duos, educent tantam quantitatem materiae, quantum vos quaeritis vno impetu educere. Item poterimus educere & diuertere per vrinam: darem ad hoc acetum scilliticum, & oxymel ante cibum. Si haberet mel scilliticum, optimum esset, quia incidere & attenuaret materias, quae ita incisae illis pillulis de tribus vel mastichinis, facile educi possint. Ad confortandum cor bis in mense mithridaticae confectionem sumat. Darem etiam baccas iuniperi, dictamnum Cretense, vel garyophyllos ad mastichadum: moderatè enim exiccarent materias cerebri, & calefacerent: sed quia cor quoque copatitur in epileptica affectione per consensum, vt nonnulli Medici epilepsiam magis cordi ascribant, ac illud immediate compati dicant. Sed haec quaestio nondum est determinata apud Medicos, vtrum cor primario, vel cerebrum afficiatur in epilepsia. Vt cunq; sit, certum est cor etiam laborare in epilepsia. Inde ad reficiendos spiritus facerem linimenta odorata, & per os darem, ante cibum, bis vel ter in septimana diambrom, vel diamuscum: ex odore enim reficerentur spiritus. Et recta ratione victus quoque eum gubernarem. Et haec facerem hac hyeme vt illum praeseruarem, quae parua quidem videntur, sed sunt maxima; & in processu tantum materiae educunt repetita, quantum vestra semel impe-

impe-